

## REGIONAL NEWS

HEADLINES:-

1. Larsap General (Rtd) Vijay Kumar Singh an Mizo thalaite chu pianpui thiamna nei tha leh thawkrim an nih thu a sawi.
2. Thlathar April ni 21-a Aizawl Municipal Corporation (AMC) inthlan chuh turin mi 68-in hming an pe lut.
3. Bilkhawthlir leh Saiphai inkar kawnga 'Sesih Lei' kum 2019 atanga dawh tan chu a hun tiama a zawh theihloh avangin PWD chuan Contractor banin sum hman bangin Department-in khawih an rel.
4. Delhi Minister Manjinder Singh Sirsa chuan state Assembly ah national capital chuan LPG cylinder a tlakchham loh thu a sawi.

&lt;&gt;&lt;&gt;&lt;&gt;

GOVERNOR

Larsap General (Rtd) Vijay Kumar Singh chuan Mizo thalaite chu pianpui thiamna nei tha leh thawkrim an nih thu sawiin, India leh khawvel pum inelnaa lang pha turin thiamna dik tak, inphochhuahna hun tha leh inrintawkna neih chu tun dinhmuna an mamawh a ni, a ti.

ICFAI University Mizoram leh Labour, Employment, Skills Development & Entrepreneurship Department buatsaih, "One Day Skills Development Conclave", ICFAI University Mizoram Campus, Durtlang North, Aizawla neih a hmanpui na ah sawiin Larsap chuan Mizo thalaite chu thawkrim tak anni a ti a, Thalaite chu India leh khawvel huap ang pawha inphochhuahna hun remchang an hmu anih pawhin, mahni hnam ziarang leh chawr chhuahna hlamchhiah lova nghet taka vuan zel turin a chah a; Ram leilung mawi, hnam ziarang hausa leh ralmuang anih avangin kawng hrang hrangah hlawhtlin theihna tur hlawkna a tel a ti a, Kutthemthiamna tipung turin chin dan thar leh mahni kutkawih eizawna kalkawp tir thiam a tul tih sawiin, skills conclave chu sawi honaah tawp mai lo se, hmalam panna, kawng dik inkawhhmuhna, infuihtharna leh danglamna thlentuah tang se a duh thu a sawi bawk.

Larsap chuan thalaite chu state leh rampum tana rohlu leh inngahna an nih thu sawiin, khawtualah lungawi mai lova, India mai nilo khawvel hmun dang thlenga hlawhtlinna chan tum turin a chah a. Kutthemthiamna leh kutkawih eizawna chawilar turin kawng dik leh boruak tha siam a tul tih sawiin, thiamna chu hlawhtling tura pawimawh a ni, a ti a. India chu khawvela nikhata hmasawna bultan thar tu tam ber anih mek thu a sawiin Sawrkar hnain mi zawng zawng a daih sen loh avangin mimal enkawl eizawna leh kutkawih eizawna lam ngaihven deuh deuh a tul tih sawiin, thalaite chu hna zawngtu ni lova siam saktu nih tum turin a fuih bawk.

Nimina hun hmanah hian Prof (Dr.) Ginlianlal Buhiril, Vice Chancellor, ICFAI University Mizoram chuan zirlaite tan lehkhabu behchhan thiamna piah lama tak rama hman theih thiamna neih a pawimawh zia a sawi a. He hunah hian zirlai, zirtirtute leh hnathawh kawnga tawnhriat nei tha zawk te an kal khawm a, tunlai khawvel thang chho zelah thiamna tak phawk chhuak zirna neih a pawimawh tawh zia uar taka sawi a ni.

&lt;&gt;&lt;&gt;&lt;&gt;

## CHHIMTUIPUI WILDLIFE DIVISION

Chhimtuipui Wildlife Division-in tun thla ni 15-a dan lova zawrh ramsa rep an man chu Lawngtlai District Court-in phalna a pek angin an hal ral. Sarep hal ralbna inkhawmah hian Chhimtuipui Wildlife Division- Dy. Conservator of Forest, Pu Mercellas Hunlawmawma chuan, heng Sarep an man kaihhawmah hian Lunglei District-a Mamte khuaw mi 4 chu Wildlife Protection Act 1972 hmanga thubuai siam sak an nih thu leh District Court-a thawn an nih tawh thu a sawi a, Wildlife Protection Act 1972 hnuaiah eng ramsa pawh tihlum leh a sa zawrh chu khap tlat a nih thu sawiin, dan bawhchhia an mante chungah dan anga hmalak zel a nih tur thu a sawi.

<><><>

## AMC

Thlathar April ni 21-a Aizawl Municipal Corporation (AMC) inthlan neih tur atana hming thehluk hun chu nimin tlai dar 3 khan a tawp a, party 3-ZPM, MNF, Congress leh BJP atangin mi 68-in Corporator chuh turin hming an thehltut.

Tun thla ni 18 a State Election Commission (SEC)-in AMC inthlanpui neih hun tur a puan atanga nimin thleng khan AMC corporator chuh tura hming pekluh hun hi hawn a ni a, SEC-in a ruahman angin inthlan buaipuitu tura a ruat Returning Officer (RO) mi 4-te hnenah hming pekluh theih a ni.

Kan corr report ngaithla ang.

Aizawl Municipal Corporation inthlan hi kil 4 atangin chuh a ni dawn a, ZPM, MNF leh Congress Party te chuan Ward -19 an chuhkim vek a, BJP Party-in ward 11-ah an chuh thung a, Corporator candidate tura hming thehltut te hi an vaiin mi 68 an ni a, chung zinga 28 te chu hmeichhia niin, INC leh ZPM-ah hmeichhe candidate 9 ve ve, MNF-ah 7 leh BJP-ah 3 an awm a ni.

Hming pekluh te hi endik a ni anga, tun thla ni 30 thleng inhnuhdawh leh hun hawn a ni.

AMC inthlan vote thlak ni hi April ni 21 ruat a ni a, April ni 27 ah vote chhiar a ni ang. Aizawl Municipal Corporation-ah hian ward 19 a awm a, heng zingah hian hmeichhiate tan a hauh bik ward hi paruk, ward no 2,4,5,11 leh 12 te a awm a, a bak ward 13 te chu candidate atana mipa leh hmeichhia nih theih ve ve na ward a ni thung.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

### SESIH BRIDGE

Bilkhawthlir leh Saiphai inkar kawnga 'Sesih Lei' kum 2019 atanga dawh tan chu a hun tiama a zawh theihloh avangin PWD chuan Contractor banin sum hman bangin Department-in khawih an rel.

Kolasib MJA thudawn danin PWD Kolasib Division-a Executive Engineer Pu H. Lalfakzuala chuan Sesih lui chu kum 2019, June ni 4 ah NABARD RIDF-XXIV sum cheng nuai 281 sing 1 sang 2085 hmanga thawh tan a ni a ti a. Contractor ah Dr. R. Lalthlamuana, M/S Blue Hill Engineering, New Diakkawn, Kolasib a ni tih sawiin Hna chu thla 18 chhunga zawh tura tih a ni a. a huntiam chhunga hna a zawh theihloh avangin vawi riat (8) a thawh chhung tur pawhsei sak niin an pawhsei hnunung ber chu Nikum November thla ah a tawp tih sawiin NABARD lamin sum an sanction theih chhung chu kum 2024 September ah a tawp tawh tih a sawi.

EE sawi danin Lei hmangtute an zahawm bakah hnathawh a zawh theihloh avangin Department in khawih chhonzawm mai ni se tiin an rel thu a sawi a, Contractor hnathawh dang Chepte Lei chu Department in an tihtawp sak thu a sawi baw.

<><><>

### SERLUI MLA

Serlui bialtu MLA, Pu Lalrinsanga Ralte-in a bial chhung khaw hrang hranga chhungkaw 500 hnenah nimin khan tui dah khawlina Plastic Tuizem a sem.

Vairengte-a tuizem sem chhuahna inkhawmah hian Pu Lalrinsanga Ralte chuan, a bial chhunga mi harsa zawkten tui thianghlim leh hrisel zawk in tur an neih theih nan leh thal tui harsat lai pawha tui thianghlim in tur harsa lutuk lova an neih theina atan tuizem chu sem a nih thu a sawi a. MLA Fund chu a bial chhung khaw hrang hranga hmasawna thlenna tur leh hmeithai, mi harsa zawk leh kut hnathawktute tan a tam thei ang ber hman a tum thu a sawi.

Tun tum hi Serlui bialtu MLA-in a bial chhunga Plastic Tuizem a sem thawh hnihna a ni.

<><><>

### FARMER'S FAIR

College of Horticulture, Central Agricultural University (CAU), Thenzawl buatsaihin nimin khan Horticulture College-ah One day Farmer-Scientist Interaction Programme cum Farmers' Fair hman a ni.

Farmer's Fair hi Horticulture Department Secretary Pi Maria CT Zuali chuan hmanpuiin Fair ah hian Serchhip leh Thenzawl atanga thlai chingtu hlawhtling te thlai thar chhuah bakah College of Horticulture a zirlai ten thil siam chi hrang hrang leh Pa an khawi te pho chhuah a ni a. Pi Maria CT Zuali chuan kuthnathawktute chu ram tan mi hlu bik an ni tih sawiin taima leh tumruh taka hnathawk zel tura chahin kuthnathawktu nih vanga incheina tawp tak inbel leh bal taka awm thin a mawi lo tih sawiin, thawmhnaw uluk turin a chah a. A phakna leh theihna chinah a taka kuthnathawktuten hlawhtlinna an hmuh theih nan hma lak zel a tum thu a sawi.

Nimina hun hmanah hian Kuthnathawktute leh College of Horticulture a thawk mithiam te inkawmin Zawhna leh chhanna hun hman a ni baw.

<><><>

## LPG IN THE CAPITAL

Delhi Minister Manjinder Singh Sirsa chuan state Assembly ah national capital chuan LPG cylinder a tlakchham loh thu a sawi. Minister chuan mipuite chu thuthang thehdarh awih lo turin a chah a, department chuan black marketing tihreh nan leh supply mumal tak a awm theih nan nasa takin hma a la mek tih a sawi. Kar thum kalta chung atang tawh khan thil awmdan chu a pangngai reng tawh tih a sawi bawk a, domestic leh commercial cylinder-te a tul dan a zira sem chhuah reng , a ti bawk. Kut laiin tlakchhamna a awm dawn lo niin a tiam bawk a, harsatna a awm chuan rang taka ngaihtuah a nih tur thu a sawi bawk.

Hetihlai hian Union Petroleum Ministry chuan Centre chuan Piped Natural Gas (PNG) chu a dah pawimawh ber tih sawiin, petrol leh diesel supply pawh tha tawkin, a man pawh a danglam lo niin a sawi. Sorkar chuan dan loa hralh zawn chhuahna vawi 2,700 a nei tawh a, black market a zawrh cylinder 2,000 an man tawh bawk.

<><><>